

欽定剿平粵匪方略

欽定剿平粵匪方略卷一百七十七 丁巳年

六月初一日 庚戌和春奏言溧水攻克後湖墅一

帶尙有逆匪蟻聚卽飭傅振邦帶兵由高陽橋  
進剿該逆突出二千餘人由湖墅龍都兩路來  
迎虎坤元等帶隊分抄斃賊多名五月十一十  
二等日督同米興朝等進紮高陽橋探得逆勢  
甚衆占踞湖墅防備極嚴十六日湖墅突出賊

三千餘名龍都出賊千餘名飛奔來撲傅振邦  
派兵迎勦並毀平石巷頭一帶賊壘新昌橋之  
賊亦各奔逃是夜大雨各軍乘勢進攻五更時  
賊營火起經鄭朝棟等奮勇先登將東南面賊  
壘六座同時奪獲各軍圍攻湖墅槍礮絡繹逆  
衆驚惶失措自相踐踏官兵四面追殺餘匪逃  
出者亦爲兵勇截殺其童家橋等處之賊望風

而逃虎坤元等帶兵追至龍都落水死者甚衆  
逆賊棄壘潰走官兵追殺三十餘里卽將龍都  
賊壘數座一律焚燬湖墅龍都同時克復共計  
先後殺賊五千餘名砍取首級一千六百餘顆  
生擒三百零五名此次在事出力人員應請彙  
同克復溧城案內一併請獎除飭傳振邦親帶  
兵勇三千餘名駐守湖墅以資防勦外其餘官

軍四千餘名當卽調赴句容助勦奏入

上諭內閣曰此次官軍攻克湖墅龍都賊壘傅振邦督  
軍進紮湖墅得勝兵勇調赴句容仍著和春張國樑  
督率進勦迅圖攻克出力人員准其彙入克復溧水  
案内一併請獎

初二日 辛亥 官文胡林翼奏言查黃梅蘄州之賊

來自宿松太湖六安其踞黃梅大河鋪者連營

二三十里並分竄十里鋪等處五月十四等日將軍都興阿等連破大河鋪等七壘二十二日又破十里鋪賊壘賊之來撲及分擾黃梅縣城廣濟縣境者均經馬步奮力進剿擒斬甚多東北路賊十餘營悉行遁去其竄踞蘄州張家塆一帶者分撲胡家涼亭鴨公嘴等處官軍連戰殲斃無數墜崖落澗死者尤多賊踞望天畝並

於黃土岡等處結壘二十七八等日官軍連次  
進擊並合蘄州紳勇踏平張家塆及范家灣賊  
壘斃賊二千有奇我軍乘勝進勦閏五月初二  
等日先燒夫子嶺汪家壩賊營五座連次斃賊  
一二千名或數百名黃土岡等處賊壘亦盡毀  
平餘賊退入望天畷等處閉伏不出官軍連日  
進攻均有斬擒邢高魁朱啟仁率勇至青石嶺

將山岡下賊巢數十間焚燬復斃賊二千餘名  
此次皖賊號稱十萬分竄楚界雖已擊退尙未  
全股肅清除分檄各路乘勝速勦外所有尤爲  
出力之員可否仰懇

恩施以示鼓勵奏八

上諭內閣曰安徽逆匪大股伺竄疊經勦洗斃賊甚多  
仍著官文等飭令帶兵文武悉力扼勦務將全股肅



清所有尤爲出力之遊擊石清吉著免補遊擊以參  
將補用都司鄭陽和著免補都司以遊擊補用並賞  
加參將銜千總陳德懋著免補千總以守備補用並  
賞加都司銜千總陶忠泰黃慶均著免補千總以守  
備補用並賞換花翎守備王可陞著以遊擊補用先  
換頂戴守備楊朝林吳嘉春均著以都司補用先換  
頂戴並賞換花翎把總趙旣發外委李德勝陳由立

均著以千總補用並賞加守備銜千總姜玉順著免  
補千總以守備卽補都司朱希廣著以遊擊補用並  
賞加參將銜都司黃勝日著以遊擊補用並賞換花  
翎守備張松林著以都司補用並賞戴花翎六品軍  
功梁美材著以千總超拔並賞戴藍翎

同日耆齡奏言據吉安府知府黃冕等稟稱吉  
安賊匪屢次出犯均爲我軍擊敗五月十六至

二十四等日賊約二三萬人分撲各營勢極猖獗我軍連日大戰殲賊二千數百人候補道王鑫一軍由吉水進剿水東甫抵周家嶺該逆分三路來撲王鑫俟該逆逼近親率弁勇出擊親兵李繩武等連殺悍賊數十名賊隊大亂伏兵齊起縱橫截擊斬首七八百名被偏落水者千餘人踏平賊壘五座

臣查吉安賊衆糾黨撲營

情形甚爲喫重賴候補道王鑫一軍疾馳援剿  
大破水東巨寇有此一捷不但吉營軍聲愈壯  
卽瑞臨二郡亦可無牽綴之虞於全局甚有裨  
益所有王鑫一軍可否容臣擇尤請獎以資激  
勸出自

天恩其陣亡員弁均經屢著戰功應請

旨優卹奏八

上諭內閣曰吉安賊匪屢次出撲經王鑫等軍擊勦疊  
勝所有出力員弁著耆齡擇尤保奏陣亡之都司易  
普照著照遊擊例議卹守備銜把總張廣生等均著  
照守備例議卹把總廖正翼等均著照千總例議卹  
軍功彭有勝等均著照外委例議卹以慰忠魂

初四日癸丑王懿德奏言汀州光澤等城克復後

經臣飛飭代理臬司趙印川保升參將畢定邦

等各率精兵健勇進攻邵武師次麻沙地方賊  
衆數千人由沙溪黃塘等處來拒官軍會合西  
鄉團練奮勇進剿殲斃賊匪無算城內之賊聞  
風膽落紛紛逃竄經畢定邦等分投截殺槍礮  
齊施轟斃逆匪數百名城外賊巢一律焚燬卽  
於閏五月初九日將邵武府城克復餘匪搜捕  
殆盡所有在事出力員弁紳士容臣查明奏請

獎敘奏八

上諭內閣曰邵武府城業經收復所有在事文武員弁  
紳勇實屬奮勉出力著王懿德查明保奏

初六日 乙卯和春奏言金陵久爲賊踞溧水句容

相繼失陷幸月前溧水克復卽飭總兵傅振邦  
一軍會合圍攻句容閏五月二十一日張國樑  
等復督隊分攻該逆於西南門各出二三千人

城外賊營亦各突出數百人分路迎拒張國樑  
督同親軍衝入賊隊刺殺悍賊數十名賊勢大  
潰官兵追殺東北門各出賊千餘人臣卽揮兵  
迎頭截殺兵勇乘勢搶進內濠放火賊營自相  
驚亂卽將南門外賊壘三座奪獲約斃賊千餘  
名生擒五十七名二十二日逆匪大股出撲張  
國樑帶同王浚等直前衝突復刺悍賊數名落



馬我軍喊聲震野盡力刺殺賊衆紛紛倒地卽  
將西南面賊營三座先後奪獲是日計共斃賊  
二千數百名生擒六百餘名奪獲軍器五百數  
十件連日四面圍攻該逆匿不出巢二十四日  
各軍攜帶攻城器具銜枚急進越濠直抵城根  
豎立雲梯城上開放槍礮官軍冒煙而上張國  
傑帶兵殺進城內街巷屍積如山於二十五日

子時將句容縣城克復其逃出之賊復經各軍  
分路殲斃殆盡約斃賊六七千名砍取首級二  
千三百餘顆生擒三百餘名米石不可勝計此  
皆仰賴

聖主天威將士用命又得署督臣何桂清籌給餉糈源  
源接濟俾士馬飽騰羣兇就戮實足快人心而  
伸

天討現擬酌留官兵防守城垣將善後事宜布置妥協  
再行移兵圍剿鎮江所有在事文武員弁兵勇  
容臣擇尤請獎以示鼓勵奏入

上命軍機大臣傳諭和春張國樑曰官軍克復句容該  
縣城防守及善後事宜布置想已妥協著卽乘此聲  
威移兵鎮江迅圖克復本日已諭令德興阿等督率  
各營兵勇攻剿瓜州並飛調水師進偪金山等處杜

賊匪往來接應之路南北夾攻更易得手鎮江克復  
再圖金陵該大臣等迅奏膚公同膺懋賞朕不勝殷  
盼江南大營勇將林立惟文職大員可與商酌機宜  
者較少何桂清於江浙地方情形甚爲熟悉前此攻  
剿徽甯賊匪調度有方近日籌給餉糈接濟大營不  
遺餘力嗣後該大臣等進兵機宜可與該督就近函  
商以期集思廣益悉臻妥善張國樑已升任湖南提

督疊荷恩施諒能益加奮勉與和春協力同心統籌營務仰答朕恩也

上又命軍機大臣傳諭德興阿翁同書曰江南軍營將士用命得以連克堅城日有起色惟鎮江瓜州勢成犄角非南北岸併力進攻則賊衆互爲應援官軍難於得手現在和春等旣移重兵圍剿鎮江著德興阿翁同書激勵將士約期攻剿瓜州不得再有延宕至

上游水師本歸德興阿等節制著卽飭令葉常春等各率弁兵同時並舉下游焦山師船一併檄令援應屆時陸兵攻勦鎮江水師卽可乘機將金山銀山蒜山等賊營蠟盡俟克復鎮江卽於金山安設水師以爲大江鎖鑰使金陵賊匪不能復行下竄該大臣等督師日久亟應乘此事機順利迅速奏功瓜州葦蕩之區非縣城可比經年累月糜餉勞師毫無把握德

興阿等尙復何顏對朕耶

上又命軍機大臣傳諭何桂清曰此次句容克復卽應  
迅攻鎮江扼斷江路以次進取金陵惟鎮江瓜州爲  
江面鎖鑰金山屹峙中流必須兩岸官軍及江面水  
師同時並舉方能得力已諭知德興阿等迅速進攻  
自可相機克復和春張國樞均能奮力圖功營中健  
將亦復不少惟少文職大員隨時商推軍情何桂清

向能實心任事朕已諭令和春與該督就近面商庶可集思廣益現在文武和衷已有明效何桂清必能與和春等同心協力迅奏膚公以慰朕望所有句容善後事宜著該督卽派妥員辦理

上諭內閣曰此次剿辦逆匪將士用命數旬之內連克溧水句容兩城甚爲得手和春總統諸軍調度有方著加恩賞加太子少保銜張國樑身先士卒屢著戰



功著加恩賞穿黃馬褂以示優異其餘在事文武員  
弁兵勇著和春張國樑擇其尤爲出力者奏請獎勵  
候朕施恩

初十日 己未 略秉章奏言查江西賊衆回竄樂安

王鑫攻破水東賊壘後擬回師潛襲樂安之賊  
忽探報廣西金田起事老賊僞禱天侯胡壽階  
率賊數萬自甯都州來將由沙溪援吉安閏五

月初十日王鑫分隊迎擊賊大敗奔逃陣斬賊首胡壽階追至瑤嶺路峻而仄羣賊蹂附而上自相蹂踐官軍槍擊矛截紛紛下墜復窮追至馬鞍山地方計四十餘里約斃賊五千名大小賊目六七十名生擒賊六百餘名奪獲大小旗幟四千餘件長矛八千餘枝刀鉞鳥槍千餘件十一日僞將軍譚姓率衆二三千屯於瑤嶺排

徊不進王鑫令所部出隊佯卻以誘之賊始下山官軍分三路疾馳而進賊不戰自潰追至五星石地方賊盡逃竄又追至嚴坊沿途斃賊八九百名各路團練搜殺逸賊二千有奇查王鑫一軍僅三千人卒能以寡擊衆巨憖殲除實爲罕見該員忠勇性生洞曉軍務其步伐整齊軍令明肅有古名將風可否

賞加勇號以示優異之處出自

天恩其陣亡員弁均請

飭部照例給予卹典以慰忠魂奏入

上諭內閣曰此次王鑫一軍攻破水東賊壘後甯都賊首胡壽階由沙溪來援經王鑫分隊迎擊賊大敗奔逃陣斬賊首胡壽階斃賊五千餘名復追至嚴坊沿途斃賊八九百名以寡擊衆殲除巨憝實屬奮勇可

嘉記名道王鑫著賞給愛什蘭巴圖魯名號陣亡之  
把總楊見美等均著交部照例議卹

十二日辛酉福濟奏言查已革漕運總督楊殿邦

於咸豐四年揚州軍營隨同攻克土城奉

交慧成存記嗣復奉

旨交臣福濟差遣委用臣到皖後疊經派令辦理廬鳳

六泗勸捐團練並無貽誤其從前防堵案內應

賠銀兩業經照數繳清可否仰懇

逾格施恩准將楊殿邦留營差委免其發遣新疆臣亦  
得收指臂之助奏入

上諭內閣曰已革漕運總督楊殿邦著免其發遣留於  
福濟軍營差遣委辦勸捐團練事宜

十七日  
丙寅  
官文胡林翼奏言皖省賊匪因年荒

糧盡裹脅饑民數十萬由黃梅廣濟蘄州蘄水

等處開道上竄我軍分路堵禦凡大小五十餘戰殺賊萬餘閏五月二十七日南勇各營於蘄州之望天畷開仗獲勝竭力窮追殺賊千餘不意深入險地伏賊羣起圍抄我軍營壘全失退至蘄水臣胡林翼甫抵黃州正值我軍敗退卽駐黃州收集潰勇補製軍械已飛調水師礮船扼守沿江並調候補道王鑫同知劉騰鴻自江

西來援至李孟羣尙阻英山不能前進餉道阻  
梗難以接濟卽調令自羅田返攻蘄水擊賊之  
尾並各行都興阿等若賊匪不遽上竄下游糧  
道尙通自以穩固九江小池口營壘爲是或分  
撥馬步相機上援務須妥爲籌畫惟楚北肅清  
數月又爲賊竄臣官文胡林翼調度失宜令窮  
寇復熾咎實難辭應請



首將臣等交部議處奏入

上命軍機大臣傳諭官文胡林翼曰湖北爲上游扼要該逆意在必爭此次南勇敗退原因賊勢衆多所致惟該匪裹脅饑民不過烏合之衆似尙不難勦散現在胡林翼已抵黃州收集潰勇補製軍械著卽督率各路兵勇迅將上竄各匪分兵截勦毋令蔓延該大臣等現調水師礮船扼守沿江並調王鑫劉騰鴻由

江西援勦自因賊衆兵單不敷調遣之故其李孟羣一軍本係赴援廬州現在已抵英山正宜乘勝進勦若遽行調回則廬州當挫敗之後困守無援必至愈形危迫所有李孟羣一軍著毋庸調回至大隊官兵圍攻九江小池口正在喫緊務須察看緩急酌量調撥毋得顧此失彼致九江賊勢復張此次斬擒賊匪已至萬餘南勇退敗因賊勢太衆官文胡林翼自請

議處之處著加恩寬免

又命軍機大臣傳諭福濟鄭魁士曰安徽逆匪裹脅  
宿太饑民間道上竄官文已調李孟羣還攻蘄水擊  
賊尾路惟皖省賊氛尙熾李孟羣已抵英山若令折  
回恐廬州更無援應本日已諭官文等無庸將李孟  
羣一軍調回俾仍由應山節節剿洗以遏皖省賊勢  
但道路梗阻湖北不能接濟所有該藩司一軍餉糈

著福濟源源分撥毋令缺乏此次皖賊由宿太等處  
傾巢竄入楚境實因皖省無兵牽制致令該逆恣意  
上竄福濟鄭魁士坐擁重兵何得株守廬州一籌莫  
展現在逆匪全力注意楚疆則皖境必有可乘之隙  
著福濟鄭魁士迅速出兵爲擣虛攻瑕之計毋得專  
待李孟羣救援致成坐困之勢至安徽雖係殘破之  
區然地方官若得幹練之員激勵鄉團安良除莠綏

輯一方卽少一方之裏脅福濟撫皖有年於察吏安民之道並不講求安望軍務日有起色務當振刷精神力圖補救若徒知索餉以供坐守之兵於軍務有何裨益耶

十九日 戊辰 署兵部侍郎曾國藩奏言查湘勇自

臣離營後赴江西投效者安謐如常吉安臨江屢獲勝仗將軍福興巡撫耆齡先後至瑞州視

師犒賞各營皆歡欣踴躍樂爲用命可見士無  
常親惟撫馭者是親不必楚人而後能用楚衆  
也臣以丁憂人員未開實缺寸心終抱不安衰  
經從戎明臣黃道周目爲不祥之人合無籲懇  
天恩俯准開除兵部侍郎實缺俾得回籍終制感激  
鴻慈實無旣極奏入

上諭內閣曰曾國藩奏稱江西各營安謐如常毋庸親

往撫馭仍請開缺守制等語曾國藩以督兵大員正當江西喫緊之際原不應遽請息肩惟據一再陳請情詞懇切朕素知該侍郎並非畏難苟安之人著照所請准其先開兵部侍郎之缺暫行在籍守制江西如有緩急卽行前赴軍營以資統率此外各路軍營設有需才之處經朕特旨派出該侍郎不得再行瀆請致辜委任

二十三日

壬申

德興阿翁同書奏言據報蘇松鎮

總兵葉常春定海鎮總兵周士法先後因病出  
缺查葉常春自嘉慶年間隨剿洋面洊升廣東  
副將嗣授蘇松鎮總兵統帶廣局各艇船歷在  
蕪湖鎮江瓜州江面剿賊曾受重傷調防浦口  
屢次擊沈賊船懋著勞績周士法以遊擊越升  
總兵統帶浙江師船扼紮焦山進攻瓜鎮屢立



戰功從無挫衄今該二員均積勞病故合無仰  
懇

天恩俯准

飭部照軍營病故例從優議卹以慰蘊魂奏入  
上從之

二十四日

癸酉

王懿德奏言據提臣鍾寶三咨報

閏五月二十一日馳抵秦甯距縣城十里之神

江橋地方紮營卽於申刻督師進攻詎該逆二千餘人膽敢出城拒敵勢甚兇悍我師鏖戰一時之久殺賊多名二十二日復派已革知縣黃光洛等帶領兵勇四百名作爲前隊甫抵縣城逆匪紛紛出撲鍾寶三督師繼進轟斃賊匪七十餘名殺斃七百餘名餘逆死力抵抗適四鄉甲丁由後路抄來逆匪四面受敵力不能支奪

路向西北逃竄又被伏兵截殺合力窮追殲斃  
無算鍾寶三督率各軍長驅直進卽於是日將  
秦甯縣城克復臣查江右髮逆勾結土匪竄陷  
秦甯縣城經提臣鍾寶三親督各軍克復城池  
勦辦尙屬迅速當卽咨覆提臣鍾寶三酌撥兵  
勇駐紮防守一面移師建甯縣地方會合進攻  
剋期恢復所有在事出力文武員弁均俟查明

分別請獎奏八

上諭內閣曰此次鍾寶三親督各軍進剿收復秦甯縣城辦理尙爲迅速著卽乘勝進攻並將建甯縣城克復所有在事出力員弁著該督查明保奏

王懿德又奏言據清流縣知縣曹紹曾等稟稱四月初七日賊匪由歸化攻撲清流域池被陷維時該縣暨署遊擊張常經在鄉防堵登時折

回督率兵民併力攻擊因賊援屬聚張常經身  
中矛傷數處曹紹曾奔往四鄉招集鄉兵於十  
七日將縣城南門攻破殲斃逆匪八九百名餘  
賊竄逃曹紹曾等仍督率鄉勇分布防守詎五  
月十七日逆匪復由南路蠡擁而來勢甚猖獗  
曹紹曾帶勇出城與賊接仗張常經帶兵由金  
錢隘追至合力圍勦無如衆寡不敵逆賊一擁

入城曹紹曾張常經等連日分門圍攻於二十  
九日由東南北三門攻入縣城殲斃賊匪千餘  
名餘匪由西門竄逃復被伏兵衝殺殲斃無算  
立將城池克復又據歸化縣知縣韋侃稟稱四  
月初六日賊匪擁衆攻撲西門該縣韋侃會同  
營弁督勇抵禦殺斃爬城賊目五名殲斃賊匪  
三十餘名匪勢稍卻初七日突有賊目率領逆

夥多名緣梯闌入南門該縣號召鄉民計圖克復隨即挑選練丁援剿斃匪一百餘名五月初四十一等日連日督同聯首邱志和等與賊接仗十餘次先後擒斬逆匪五百餘名二十八日會同署把總賴得陞等督率七里甲丁沿途截殺殲斃逆匪六七十名卽於是日將城池收復臣查汀州府屬清流歸化等縣均係逼近逆氛

據稱賊衆兵單倉猝失陷尙屬實情現在雖經  
收復難保無逆匪回竄滋擾旣據該縣曹紹曾  
章侃等各將失守縣城自行收復與事後調集  
大兵攻克城池地方官隨同收復者情稍不同  
惟先經失守究屬堵禦不力咎無可辭相應請  
旨將清流縣知縣曹紹曾歸化縣知縣章侃署汀州左  
營遊擊張常經一併革職仍勒令幫同接署之



員辦理籌防事宜以觀後效儻被逆匪回竄滋  
擾或查該縣等有先期潛避情事另行從嚴叅  
辦奏入

上諭內閣曰福建汀州府屬之歸化清流等縣先後被  
匪竄陷雖經該縣知縣曹紹曾等糾集團練協同兵  
勇各將失守縣城自行收復究屬堵禦不力清流縣  
知縣曹紹曾歸化縣知縣韋侃署汀州左營遊擊張

常經著一併革職仍勒令幫同接署之員辦理籌防事宜以觀後效儘查有先期逃避情事卽著嚴行叅辦

王懿德又奏言查汀州邵武府屬之歸化清流泰甯等縣續經先後收復惟甯化建甯兩邑尙被賊匪竄踞提臣鍾寶三各軍均於閏五月二十六日統率得勝之師就近馳赴建甯上下夾

勦該縣賊勢已窮不難剋期恢復現在飛咨提  
臣鍾寶三一俟克復建甯立即移師甯化迅圖  
攻克以便會同汀漳龍道英樸一軍搜捕上杭  
武平等處餘匪庶汀屬醜類可期肅清臣察看  
閩省軍情已定大局羸安現定於六月初八日  
仍帶省標兵二百名凱撤旋省其餘原帶福建  
兵丁暫留延郡巡防隨時陸續裁撤至上下游

各路軍務及善後一切事宜仍由臣旋省後調度督辦總期餘匪淨盡各路蕩平仰副

聖主眷顧海隅綏靖黎元之意奏入報

聞

二十七日丙子耆齡奏言據報已革副將周鳳山

於五月二十七日督率各營環攻龍泉縣城斃賊無算奪獲器械五百餘件是日城賊自北門

三  
擁出又經梅文裕等擊回周鳳山復派隊每夜  
施放火器使賊不得休息如是三日乃於閏五  
月二十五日渡濠環擊投誠賊目內應各勇緣  
梯登城逆匪猶拌死巷戰各兵勇分投兜殺共  
斃賊三千餘人奪獲軍械一千數百件當將縣  
城克復臣查周鳳山先因防勦失利奏參革職  
此次力拔龍泉縣城實屬深知愧奮合無仰懇

天恩俯准將周鳳山開復原官遇缺卽選並

賞還花翎其餘在事出力人員容俟查明另覈請獎陣

亡員弁並請一併

飭部議卹奏入

上諭內閣曰已革副將周鳳山督兵環攻龍泉縣城當  
卽克復尙知愧奮著開復原官遇缺卽選並賞還花  
翎其餘在事出力人員著耆齡查明擇尤保奏陣亡

把總楊士遂著照把總例外委劉之益著照外委例  
併交部議卹

耆齡又奏言查萬安縣城賊踞日久勢甚猖獗  
四月初三等日遮克敦布督同弁兵由大嶺東  
路進剿殲賊百餘名並礮斃僞將軍陳寶林一  
名復攻北路之賊斬馘六十餘級敗匪落水淹  
斃數百人該逆上竄拒敵五月初四日遮克敦

布親率各營力戰殲斃賊首僞將軍李逆並黃  
衣賊目五名其被轟斃淹斃者約二千餘人自  
初六至十九日該逆連次撲營均經擊退二十  
三日城賊進紮井源木塘築壘二十餘座以偏  
我軍遮克敦布督勇迎勦鏖戰多時我軍佯卻  
誘之匪衆來追伏勇突出斬騎馬賊目甚多軍  
功劉嗣岐等督帶礮船夾攻奪獲賊船四隻大



礮數尊二十四日遮克敦布台藍玫等率領精銳繞出賊前將賊營燒燬殲賊二千餘人二十五日復攻破北門外賊營土城三座餘匪悉遁入城該逆復分竄龍泉縣地方經周鳳山殺斃三百餘人賊衆回竄又殲賊數十人淹斃者不計其數二十五日遮克敦布督同水陸各軍先由東門緣梯而上兵勇擊沈賊船數十隻水勇

亦卽登岸攻克東門軍功湯彪及署知縣邊其  
豐等自東門攻入斃賊千餘餘匪開北門逃往  
下游礮船會同各營追勦搜捕共奪獲黃旗五  
百餘面五百斤大礮六尊刀矛器械無算當將  
萬安縣城收復臣查萬安爲吉安贛州二府咽喉  
自上年被匪攻陷勾結蔓延黨與甚衆遮克  
敦布移師會勦大小數十戰將四鄉之賊次第

纂要卷一百二十一  
三  
翦滅始得併力攻拔縣城上游一律肅清吉贛  
河道通順勦辦洵屬奮勉在事出力人員容俟  
查明擇尤額懇

恩施以昭激勸奏入

上諭內閣曰此次遮克敦布移師進攻節節勦洗克復  
萬安縣城上游一律肅清吉贛河道通順勦辦尙爲  
得手所有在事出力人員著耆齡查明擇尤保奏

耆齡又奏言道員王鑫自嚴坊獲勝後餘匪竄  
至樂安聚賊數萬由甯都將竄沙溪王鑫卽率  
一千二百人於十九日馳赴沙溪賊以數千前  
來誘敵我軍堅壁不出賊匪漫山而至離營僅  
里許王鑫令王文瑞督隊繞出右路山脊張運  
蘭督隊繞出左路山脊章澂等率團勇爲疑兵  
王開化帶兵迎擊王鑫親督各隊繼之王文瑞

等首先遇賊斬馘三百張運蘭等亦殺賊數十人兩路逆匪俱敗中路之賊亦隨之潰王鑫督同王開化等乘勢追擊殺賊六七百人追至拱岡背該處兩山陡絕中惟一徑僅容一騎賊扼此日以拒我軍各勇斬關而過斃賊百餘人我軍追至韶源該處屯賊數萬連營十餘里不意我軍驟至驚駭失措相率潰奔當將賊營概行

焚燬分路窮追通計斃匪三千餘人生擒數百  
名訊據供稱係僞將軍洪逆楊逆等由甯都來  
援吉安其吉安府城之賊連次出撲經知府趙  
煥聯等擊敗殺賊七八百名水師復截擊萬安  
敗匪於冶下墟斃斃無數臣仍嚴飭各軍迅速  
克復郡城以期盡殲醜類奏入報

二十九日

戊寅

和春何桂清奏言遵查德興阿在

江北紮營均在蔣王廟一帶距瓜州賊營三十餘里每遇出隊甫近賊營兵力已疲不過開放槍礮未能竭力攻擊逆匪伏巢不出往往未經接仗旋即收隊所報獲勝情形遂有未能盡實之處採聽輿論似非無因臣等復加訪察該大臣從前打仗尙屬奮勇惟近年親身督剿之時

甚少外聞因有患病沈重行動維艱之語臣和  
春上年秋閒至江南時繞過蔣王廟曾經接見  
步履一切如常並無病情至侍衛蘊秀言論尙  
屬明白似無乖謬情形惟與德興阿不甚浹洽  
雖無把持情事但與軍營究屬未宜可否

飭令回京供職奏入

上命軍機大臣傳諭德興阿翁同書曰據和春何桂清



奏侍衛蘊秀帶兵不能得力等語蘊秀在揚州軍營  
曾經德興阿等保奏賞給副都統銜該侍衛帶兵打  
仗究竟能否奮勇著德興阿翁同書秉公確查如果  
該侍衛在營不能得力卽據實具奏再降諭旨

和春何桂清又奏言前奉

諭旨許乃釗賞給三品頂戴前赴江南和春軍營辦理  
文案許乃釗到營後臣等察其品端學優老成歷練

熟悉江浙情形與之籌商軍務及用人行政各事宜所論無不剴切詳明悉合機宜稽覈一切文案亦極允當洵堪爲指臂之助奏入

上諭內閣曰三品頂戴許乃釗著在和春軍營幫辦軍務

和春又奏言自溧水句容相繼克復後臣隨卽派撥官兵前赴鎮江一面飛致德興阿及水師

總兵泊承陞等南北會合以期三面夾擊張國  
樑遂於六月初五日督同虎嵩林等連日紮營  
逼近賊壘十一日銀臺山賊壘突出七八千人  
分路來撲都司周顯親等迎擊斃賊數十名該  
逆恃衆抵拒張國樑率領副將李若珠等分路  
接戰殺賊無算該逆勢甚兇悍仍復不退周顯  
親又帶兵衝入立刺悍賊數名落馬被賊槍洞

腹陣亡張國樑揮令李若珠等左右夾攻周天  
培馮子材等從後抄擊斃賊不計其數並擊倒  
黃衣悍賊數十名乘勝追擊該逆尙敢紮駐山  
梁抗拒我軍冒煙槍上斃賊甚衆餘皆敗逃甘  
露寺金山等處又各出賊千餘來援余萬清虎  
嵩林等分途截勦泊承陞等亦督水師攻擊甘  
露寺賊營逆勢大敗狂奔官軍追殺至城西門

該逆滾崖落澗死者不可勝計計是日斃賊六七百名砍取首級五十餘顆奪獲黃旗馬匹軍械五百餘件都司周顯親臨陣捐軀深堪憫惜  
應請

旨飭部從優議卹奏入

上諭內閣曰逆匪踞守鎮江死力抗拒我軍旣已移營進剿獲勝著和春張國樞速卽乘機力圖克復並飭

南北岸水陸各軍併力攻取毋稍延玩陣亡都司周  
顯親戰功屢著臨陣捐軀深堪憫惜著交部從優議  
卹